

3/2017 FORU ARAUA, uztailearen 12koa, Bizkaiko Lurralde Historikoko Udalek Bizkaiko Batzar Nagusietan araugintzarako ekimena aurkezteko prozedura arautzen duena. (2017ko uztailearen 19ko BAO)

Jakinarazten dut ezen Bizkaiko Batzar Nagusiek Bizkaiko Lurralde Historikoko Udalek Bizkaiko Batzar Nagusietan araugintzarako ekimena aurkezteko prozedura arautzen duen 2017ko uztailearen 12ko 3/2017 Foru Araua onartu dutela, 2017ko uztailearen 12ko

Osoko Bilkuran, eta nik foru arau hori aldarrikatu eta argitaratzeko agindua ematen dudala, aplikatu ahal zaien herritar, norbanako eta agintari guztiek bete dezaten eta betearaz dezaten.

BIZKAIKO UDALEK BIZKAIKO BATZAR NAGUSIETAN ARAUGINTZA-EKIMENA AURKEZTEKO PROZEDUREARI BURUZKO UZTAILAREN 12KO 3/2017 FORU-ARUA

ZIOEN ADIERAZPENA

Bizkaiko Lurralde Historikoko udalek araugintza ahalmenean benetako parte hartzea izan daien, bada, beharrezkoa da hori foru arau honen bitartez arautzea, hori guztiori udalek araugintza funtzinoan benetako parte hartzea izatea suspertzeko eta erakunde-politika erabat parte hartzailea bultzatzeko.

Ildo horretatik, Bizkaiko Batzar Nagusien Araudiak berak (2015eko maiatzaren 22ko 96 zenbakidun Bizkaiko Aldizkari Ofizialean) 113 c) artikuluan esaten dau araugintzarako ekimena Batzar Nagusien aurrean dabela, besteak beste, «Bizkaiko udalek, foru arauz arautu daitenaren arabera».

Halanda ze, agindu hori beteteko, Bizkaiko Lurralde Historikoko udalen araugintza-ekimenari buruzko foru arau hau onartzen dabe Batzar Nagusiek, eta, era berean, d) letra gehitzen jako Bizkaiko Kondaira Lurraldeko Foru Erakundeen Hautapen, Antolaketa, Erregimen eta Funtzionamenduari buruzko otsailaren 13ko 3/1987 Foru Arauaren 8. artikuluari.

LEHENENGO KAPITULUA XEDAPEN OROKORRAK

1. Artikulua *Helburua*

1. Bizkaiko Lurralde Historikoko udalek Bizkaiko Batzar Nagusietan araugintza-ekimena arautzea da foru arau honen helburua.
2. Udalen araugintza-ekimena foru arau-proposamenak aurkeztuta gauzatuko da.

2. Artikulua *Kanpoan geratzen diran gaiak*

Foru arau honetan araututako araugintza-ekimenetik kanpo geratzen dira honako gaiok:

1. Batzar Nagusien araugintza-eskumenetik kanpo dagozanak.
2. Bizkaiko Lurralde Historikoko foru erakunde propioen antolaketa, araubide eta jarduerari jagokezanak.
3. Tributu arlokoak, salbu eta toki korporazinoen tributu propioenak.
4. Bizkaiko Lurralde Historikoaren aurrekontu eta kontu orokorrak eta horreen aurrekontu aldaketak.
5. Udal eskumenez besteko guztiak.

6. Giza Eskubideen Adierazpen Unibertsalaren aurkako ekimenak edo gure ordenamendu juridikoan oinarritzko giza eskubideen ganean jasorik dagozan itun eta nazinoarteko akordioen aurkakoak, bai eta xedapen horreetan jasoriko eskubide zibil, politiko, ekonomiko, sozial edo kulturalak urratu nahi dituan beste edozein be.

3. Artikulua *Betekizunak*

Udalen araugintzarako ekimena foru arau-proposamena aurkeztuz gauzatuko da. Gitxienez, Lurralde Historikoko udalen %10ak aurkezturik eta udal horreetako osoko batzek gehiengo osoz onarturik egongo dira, beti be udal guztion zentsuaren batura Lurralde Historikoaren zentsuaren %4tik beherakoa ez bada.

4. Artikulua *Dokumentazioa*

Araugintza-ekimena aurkezteko idatzia dana dalako alkate jaun-andreek izenpetuko dabe, eta horregaz batera honakoak aurkeztuko dira:

- a) Foru arau-proposamenaren testu artikulatua, zioen adierazpen eta guztikoa.
- b) Udal sustatzaileen eretxiz foru arau-proposamena Batzar Nagusien aurrean izapidetu eta onartzeko dagozan errazoiak, zioak eta oinarriak jasoten dituan memoria.
- c) Udal idazkarien ziurtagiria, araugintzarako ekimena aurkezteko udal batza bakotxaren erabagia gehiengo osoz hartu izana egiaztaten dauena.
- d) Udal sustatzaile bakotxaren idazkariaren ziurtagiria, udalaren biztanle kopurua egiaztaten dauena.
- e) Memoria ekonomikoa.
- f) Generoaren eraginaren eta joakozan neurri zuzentzaileen txostena. Udalek horretarako pertsonalik izan ez eta ezin badabe egin txosten hori, Bizkaiko Foru Aldundiak egingo dau.

BIGARREN KAPITULUA IZAPIDETZEKO PROZEDUREA

5. Artikulua *Hasierea*

Foru arau-proposamena izapidetzeko prozedurea hasteko, Bizkaiko Lurralde Historikoko Batzar Nagusietako erregistro nagusian aurkeztuko da aurreko artikuluan eskatzen dan dokumentazioa.

6. Artikulua *Foru arau-proposamena izapidetzea onartzeko betekizunak*

1. Batzar Nagusietako Mahaiak jasotako dokumentazioa aztertu eta arauzko epean emongo dau proposamena izapidetu ahal izatearen ganeko ebazpena. Horretarako, bada, aurretiazko txosten juridikoa eskatuko da, izapidetzea ez onartzeko hurrengo zenbakian araututakoren bat balego-edo.

2. Proposamena izapidetzea ez da onartuko:

- a) Foru arau honetako 2. artikuluan zehaztutako gairen bati buruzkoa bada.
- b) Aurkeztutako dokumentazioak ez baditu beteten foru arau honetako 4. artikuluan zehaztutakoak. Dana dala, akatsa konpontzerik badago, Batzar Nagusietako Mahaiak, Lehendakariaren bitartez, joakenei eskatuko deutse akatsa zuzendu daiela, hilebeteko epe barruan. Hilebetea joan eta zuzendu ezean, sustatzaileek izapidetzeari uko egiten deusiela ulertuko da.
- c) Proposamenaren testua alkarren arteko homogeneotasunik bako gaien ganekoa bada.
- d) Gai berari buruz agintaldi berean Batzar Nagusietan daborduko izapidetutako proiektu edo foru arau-proposamenen bat egon bada.
- e) Agintaldi berean aurkeztutako beste udal araugintza-ekimenen baten berbera edo funtsean paretsua bada.

7. Artikulua *Bizkaiko Foru Aldundiaren adostasuna*

Ekimena izapidetzeko onartutakoan, Mahaiak Foru Aldundiari igorriko deutso, aurrekontu-kredituak gehitzea edo aurrekontu-sarrerak gitxitzea dakarren aztertu eta aintzat hartzearen ganean edo izapidetzearen ganean eretxia emon daian, Batzar Nagusien Araudiaren 117. artikuluan xedatutakoaren arabera.

AZKEN XEDAPENA

Foru arau hau Bizkaiko Aldizkari Ofizialean argitaratu eta biharamonean sartuko da indarrean.

XEDAPEN INDARBAKOTZAILEA

Foru arau honen aurkako edo kontraesaneke arau guztiak indarbakotuta geratzen dira.

Bilbon, 2017ko uztailaren 12an.
Batzar Nagusietako Lehendakariak, ANA OTADUI BITERIK
Batzar Nagusietako Bigarren Idazkariak, ELSA PAMPARACUATRO MERCHANEK



Dokumentu honen helburua da bakarrik informazioa ematea, ez du inolako balio juridikorik.